


J. public.
Citation vnd vor=
beschied des Key=
serlichen Camerger=
richts zu Speyer /
Widder Hertzog Heinrichen
von Braunschwig / vnd etliche
seine vnterthanen.

Durch die Stad Gosslar aus=
gebracht.

1 5 3 9



0 2 5 1

Bayerische
Staatsbibliothek
München



Kir Karl der fünffte
von Gottes gnaden Römischer
Keyser / zu allen
zeiten merer des Reichs
zc. Inn Germanien / zu
Dispanien / beider Sicilien /
Jherusalem /
Hungern / Dalmacien / Croacien zc. König /
ertzherzog zu Osterreich / Hertzog zu Burgundi
zc. Graue zu Nabsburg / Flandern /
vnd Tyrol zc. Entbieten dem Nochgebornen
Heinrichen / Hertzogen zu Braunschweig /
vnd zu Lüneburg / vnsern lieben Dheim
vnd Fürsten / Auch Ersamen gelerten /
vnd vnsern vnd des Reichs lieben getrewen /
Burckharten von Salder / Lamprechten
seinem Knecht / Willicken Klencken / Hansen
vnd Fridrichen von Gladebeck / Heinrichen
Koch etwa gewesnem Schreiber zu Scheinungen /
Matthesen von der Schulenburg /
Abode von Kanstein / Abode von Westphalen /
Schwartz Albrechten / Hansen Weller-
sen / Schwart Dieterichen / Hansen Koch /
D. Johan Staplern / Cantzlern / Johan
Damenstet / auch Martin Ketterlin beiden
Secretarien / Balthasarn Stechow Ampt-
man zu der Steinbrück / Georg Zigenmeyer /
Bertholden Zigenmeier / Hansen Dintz /
Achim Riben / Jacoben Wildschütz / Antho-
nien

A 4

nien von Doll/Andressen Schledinck/Mat-
thesen Holtzfürster auff Echtenberg/Wen-
ny Donrat/Conradten Knipping zu Langes-
sen/N. Eichstet /gedachts vnser Oheims
Wertzogen Heinrichs Camerjung / Widig
Kind von Falckenburg/Georgen von Wrede/
dem alten hane / Micheln Müller / Hanssen
Betthück/Werman Bock / Lorentzen Wey-
land / vnd Weinrichen Kinderman. Vnser
gnad vnd alles gut. Nochgeborner Oheim/
Fürst / Ersamer gelarter vnn lieben getrew-
en/vnserm Keiserlichen Camergericht / ha-
ben vnser vnd des Reichs lieben getrewen /
Bürgermeister vnd Radte der Stadt Gosslar/
mit klag furbringen. Wie nu etliche
Jar her/sie/gemeine Stad Gosslar / ire Bür-
ger/verwandten vnd angehörigen / von iren
widerwertigen vnd abgesagten Feinden/de-
ren sie etliche mit vrteil/Recht vnd schwerem
kosten/jnn vnser vnd des heiligen Römischen
Reichs Acht erlangt / auch also als Achter
offentlich denunciren vnd austünden lassen /
mit Raub/name/brand / todschlegen / vnd
sonst jnn vielerley andere wege beschediget vñ
beleidiget worden/Vnd sonderlich jnn dem/
des verschienen dreissigsten jars / im Monat
Octobri/als damals weiland Doctor Con-
radt von Dellinghausen / ihr bestelter Advoca-
cat vnd Diener / von einer gütlichen tagsatz-
ung/so wir zwischen jnen/vnd dir gemeltem
vnserm

vnserm Oheim Hertzog Heinrichen ange-
setzt/nach geübter handlung / mit einer son-
dern vnser Keiserlichen vergleitung / von
Augsburg abgescheiden/durch weiland Ger-
harten von Falckenburg / vnd Luch obge-
nenten Georgen Zigenmeyer / vnd Baltha-
sarn Stechaw Amptman zu der Steinbrück/
inn seinem wider heimreiten / vor Dornberg
an der höhe/nidergeworffen/vnd ihm alles
das jene Er an barschafft/Kleinertern/Auch
brieff vnd siegeln/die Er bey ihme(gemeiner
Stad Goslar zugehörig) gehabt/vñ auff be-
stimmten güttlichen tag zu Augsburg gebrau-
cht/sampt dem Keiserlichen gleich genomen/
das auch solche briene deiner lieb/dir/gemel-
tem vnserm Oheim Hertzog Heinrichen zu-
geschickt worden/vnd volgends gemelte wei-
lend Doctor Conradt Dellinghausen / von
Luch den Thetern hin vnd hergefurt / vnd
demnach / als er auff vnterhandlung / von
deiner lieb Hertzog Heinrichs wegen durch
euch gemelte Johan Damestet Secretarien/
Burckharten von Salder / Willicke Klenck-
en / vnd andere mehr mit Luch den Thetern
geschehen / vnd ewer beider Salders vnd
Willicke Klencken / darauff vmb viertausent
gulden fur dich vnsern Oheim Hertzogen
Heinrichen geschehen verbürgung ausge-
dachter weilend Gerhards von Falcken-
burg / vnd dein Georgen Zigenmeyers inn
A iij dein

dein des Hertzogen handen gestellt (oder wie
man sagen möchte) verkaufft wordē/darauff
auch weiter von einem zu dem andern ort/inn
das ander / vnd zu letzt gen Scheiningen
inn deiner Hertzogen Weinrichs E. Schlos
geführt worden / vmb das auch/deiner Lieb
diener /so daselbst sein gewartet (Er aber Sie
darfur nicht erkent) vielerley one zweuel der
sachen darumb man streitig erforscheit / das
Er auch zu letzt daselbst die schuld der natur/
nach zweien jarn vngeferlich bezahlt/vnd dur
ch Euch vorgegente / Jacoben Wildschütz
en/vnd N. Eichtet/dein des Hertzogen Ca
merjung/so ime von deiner liebe wegen zube
waren zugegeben/inn dem Wale /desselben
Schlos begraben worden. Alles wider ge
mein geschriben natürlich Recht /auch alle
Erbar vnd billigkeit/ihnen einem Rathe/zu
mercklichem nachteil/schaden/spot vnd ho
ne/durch welche jtz oberzelte/Auch sonst an
dere mehr verdecktliche handelungen/inn et
lichen Artickeln / darüber gestellt / weiter ge
melt vnd angezeigt (darnon wir deiner lieb/
vnd euch allen vnd jedem inn sonderheit ob
gemelt hiebey Copeyen zuschicken) dein lieb/
vnd jr euch obberurter/vnd inn jtz gemelten
Artickeln nach der lenge erzelten thaten mehr
dann verdecktlich gemacht haben solten.
Darumb sie dann willens vnd der meinung
berurts verdachts halber/auszulassung vnd
ver

vermöge / vnfers vnd des Reichs gemeinert
offen ausgekunten Landfriedens / wider dein
lieb / vnd euch auff die purgation zuhandeln
vnd procedirn. Auch deshalb Rechtlicher
hülff nottürfftig seien. Vnd darauff vmb sol-
che hülff / vnd diese vnser Keiserliche ladung
demütiglich anruffen vnd bitten lassen / Die-
weil wir nu meniglichen Rechtens zuuerhel-
ffen schuldig / vnd geneigt seien / ihnen auch
solche ladung erkent worden. Darumb so
heissen vnd laden wir dein lieb / vnd Euch al-
le vnd jede obgenant / inn sonderheit von Röm-
mischer Keiserlicher macht hienit / das jr auff
den neuntzehenden tag des Monats Nouem-
bris nechstkünfftig / den wir euch für den er-
sten / andern / dritten / letzten vnd endlichen
Rechttag setzen vnd benennen / Peremptorie /
Oder ob derselb tag nicht ein gerichtstag
sein würde / den nechsten gerichts tag dar-
nach / selbs persönlich / vnd wie ihr / vermöge
berurts Landfriedens schuldig seiet / an ge-
dachten vnserm Cammergericht erscheinet /
Euch aller vnd jeden obgemelten handlung-
gen / Artickel vnd verdachts / souiel Eur jden
die berürn / mit euern leiblichen eiden (ob ihr
möcht) innhalt gemelts Landfriedens zuent-
schuldigen vnd purgiren / vnd ob ihr solche
entschuldigung nicht thetet / oder auff diese
vnser Keiserliche vertagung nicht erscheinen
würdent / Als dann zu sehen vnd hören / euch
gemelt

gemelter Landfriedbrüchigen thaten/ hand-
lungen vnd verdachts schuldig zu halten /
Auch darauff gegen euch handeln vnd proce-
diren/ Wie sich nach gestalt der sachen/ vnd
offtgemelts Landfriedens gebürt. Oder aber
rechtmessige einreden /warumb solchs alles
vnd jedes nicht geschehen solle / furzubrin-
gen/ vnd denselben handlungen vnd sachen/
auch allen ihren gerichtstagen vnd terminen/
bis zu ende aus zuerwarten. Wann jr komet
vnd erscheinet als dann also / oder nicht/ So
wirdet nichts destominder gegen euch / wie
obstehet/ der gebür nach/ volfarn/ gehandelt
vnd procedirt/ Darnach wisset euch zu rich-
ten. Wir geben vnd schreiben auch deiner E.
vnd ewer jedem hiemit / von vnser vnd des
Reichs wegen/ inn krafft gemelts Landfrie-
dens vnd der satzung darbey gemacht zu/ vn-
geferlich gleich zu/ bey/ vnd von solchem tag/
bis widerumb an ewer gewarsam/ für Euch
vñ alle die jenen/ so jr zu solchem tag mit euch
bringt/ vngeuerlich. Geben inn vnser vnd des
Reichs Stad Speier/ am 23. tag des Monats
Juli. Nach Christi vnser Derrn geburt/
xv. hundert vnd im neun vnd dreissigsten.
Vnserer Reiche des Römischen im ein vnd
zwentzigsten/ Vnd der andern aller im vier
vnd zwentzigsten jaren. Ad mandatum do-
mini imperatoris propriū. Casper Damera-
stetter iudici Camere Imperialis prothono-
tarius/ sst.

Sum

Zum ersten / Setzt vnd sagt Sindicus war
sein / das der Durchlechtig Nochgeborn
Fürst vnd herr / herr Heinrich Dertzog zu
Braunschweig vnd Lüneburg / vnd von sei-
ner F. G. wegen / Burckhart von Salder /
einem / genanten Dansen Koch / verschierer
jare befolhen haben / leut zuwegen zubrin-
gen / welche deren von Goslar feinde wür-
den / vnd inen ihre hütten abbrenten. Zum
andern / das darauff einer genant Derman
Kaslar / feind worden / welchen feind die von
Goslar mit dreyhundert gülden abgekauft
haben. Zum dritten / noch einen feind /
Lorentz Weylandt geheissen / zu Wulffesha-
gen / im gericht Sesen / hochermeltem Der-
tzen zustendig / hat Dans Koch / aus be-
uelh sein / des Dertzen / mit denen von Gos-
lar vertragen müssen / damit er nicht niderlege
vnd die practick an tag keme. Zum vierden /
sagt Sindicus war sein / das hochermelter
Dertzog / Dansen Kochen verschierer zeit /
auch befolhen / ihm einen zuwegen zubrin-
gen / Welcher der von Goslar feind würde /
vnd allein den namen hette / der Fürsten aber
vnd die seinen / wolten die that thun. Zum
fünfften / das er Dans Koch / darauff einen
aus Goslar Heinrich Kinderman genant /
ausgerichtet / vnd den zum Dertzen inn ein
wüstung geführt / Dolgen genant. Zum
sechsten / das daselbst Burckhart von Sal-
der /

B der /

der/neben dem Hertzen / mit dem stzge-
nanten Heinrich Kinderman gehandelt/das
er ihm bis gen Sandersheim / wie es auch
geschehen / volgen sollte. Zum siebenden/
ist war/als Heinrich Kinderman gen San-
dersheim kommen / hat Johan Damenstet/
hochgemelts Hertzen Secretarius / so da-
selbst aus beuelh des Fürsten / den Vhed-
brieff/ an die von Goslar gemacht. Zum
achten / das gemelter Kinderman densel-
ben mit eigner hand vnderschreiben müssen/
vnd derhalben sich die von Goslar mit ihm
auch vertragen. Zum neunnden / ist war/
das hochgedachter Hertzog im jar acht vnd
zwentzig / der weniger zal / Burckhart von
Salder/ besolhen/ mit Hans Koch zu re-
den / das er einen nach Zelle / zu einem ge-
nant Georg Ziegenmeyer/ schicken solt/zu im
zukomen. Zum zehenden / hat darauff
Hans Koch einen genant Bertold Ziegen-
meyer/zu im Georgen Ziegenmeyer geschickt/
vnd ihn gegen Greben zu Burckharten von
Salder bringen lassen. Zum eilfften/ das
Burckhart daselbst/ mit ihm Jörgen gehan-
delt / das er der von Goslar feind werden
solte/Mit zusage/die vheide solt nicht ein jar
dawern/vnd die von Goslar solten ihm drey
hundert gülden geben / Wo nicht/ wolte sie
im der Hertzog geben. Zum zwöfften / ist
ferner war / das darnach im selbigen jare/
zwischen

zwischen Michaelis vnd Martini / nach dem
sich Jörg Ziegenmeyer / gegen den von Gosslar / mit absagung vnd vriedbrieffen / welche
Damenstet / vnd Burckhart von Salder gemacht / verwart / als bald Dansen Koch geschrieben / zu im gegen Brehen zukomen / wie
dann geschehen. Zum dreitzehenden / das
Burckhart von Salder daselbst Dansen Koch befolhen / das er Gerdt von Falckenburg /
so auch dahin komen / auff sein ansuchen / fürderung thun solt / dann Gerdt von Falckenburg /
solt sich Jörgen Ziegenmeyers annehmen / vnd Dans Koch solt Gerdt anweisung thun. Zum viertzehenden / das darauff
Dans Koch mit Gerdt von Falckenburg / müssen reiten / vnd ein haltstat besichtigen /
zwischen Langessen vnd Luther / darein sie wolten rücken / bey hundert pferden / vnd die
von Gosslar schlagen. Zum funffzehenden / das domit / hochermelts Dertzogen hoffdiener /
gewesen. Zum sechtzehenden / ist war / das zu fürderung gehe solcher fürgehabter
Landtfriedbrüchigen thatlichen handlungen / Achtzeihen fustknechte an einem andern
ort / ausgeschiedt sein worden / welche die wegen ausspannen solten / vnd wann die
von Gosslar den knechten die pferde wolten ablagen / solten sie mit den pferden auff die
haltstat fliehen / vnd die von Gosslar also locken / vnd auff die fleischbanck opfferen.

¶

Zum

Zum siebenzehenden / ist ferner war / das dar-
nach auff zeit / als die Erbarn Stedte / Gosslar /
Magdeburg / Braunschweig / Wildes-
heim / Göttingen / Dannober vnd Lymbeck /
die von Gosslar von hochemeltem Hertzo-
gen / gegen solchem bestimpten tag / schrift-
lich geleidt vberkomen / hat sein F. G. Dansen
Kochen inn werender tagleistung auff Wol-
denberg zukomen / einen boten geschickt.

Zum achtzehenden / als gemelter Dans
Koch gen Woldenberg kommen / das im der
Fürst in bey sein Burckharten von Salder be-
solhen / das er Dans Koch / zu sampt itzigem
Amptman zur Steinbrücken / Balthasarn
Stechawe / vnd Bertolden Ziegenmeyer / die
er ihm zugegeben habe / ein haltstat besichti-
gen solten / darinn sie die nacht etliche Reuter
bringen / vnd die von Gosslar daraus inn ge-
gebnem Fürstlichen geleidt auff der greni-
tzen niederlegen / vnd hinweg führen solten.

Zum neuntzehenden / war sey / das solcher
anschlag allein darumb sein furgang nicht ge-
habt / das die von Gosslar damals zustarck
gewest.

Zum zwentzigsten / ist war / das
Dans Koch / mit Gerdt von Falckenberg /
ein andere haltstat / aus beuelh hochge-
dachts Fürsten von Braunschweig / ausse-
hen müssen / inn welche die Reuter gezogen /
vnd haben der von Gosslar strassen hütter ge-
schlagen / derselbigen vngeserlich auff zwölff
perso-

personen erbarmlichen vmbbracht / vnd erwürgt / vnd vngeserlich bey sechtzig pferden raublich weggenommen. Zum ein vnd zwentzigsten / das auch einer aus den theatern / ein Edelman Braunbock genant / vnd auch ein knecht daselbst tod blieben. Zum zwey vnd zwentzigsten / das doselbs auch Jörg Ziegenmeyer der Principal / auff die zeit durch den hals geschossen worden. Zum drey vnd zwentzigsten / das bey solcher that sein gewesen viel / hochgedachts Fürsten Amptleute / darzu noch zween Landsknechte / so der zeit sich auff der Steinbrücken / vnd ein Woltzfürster Matthias genant / so sich auff dem Schlos Lechtemberg / alles dem Dertzen zustendig / damals gehalten. Zum vier vnd zwentzigsten / war sey / das das alles / wie inn den negst oben gemelten vier Artickeln geschehen / auff Donnerstag nach Valentini / im jar der minder zal / Dreissig / inn welchem der Reichstag zu Augspurg gehalten worden. Setzt zum fünff vnd zwentzigsten weiter / das inn derselbigen geschicht / als Jörg ist geschossen worden / sein mit gewesen / Matthias von der Schulenborch / Jörg de Wrede / Rabode von Kanstein / vnd hat genanter Matthias von der Schulenborch / ihn Jörgen / da er geschossen war / auff sein Schlos Aldenhausen genomen / vnd heilen lassen. Zum sechs

sechs vnd zwentzigsten / sagt Sindicus fer-
ner / als der Rath von Goslar seine herren
Principales / im jar der minder zal / Dreissig /
auff den Reichstag gen Augspurg haben wol-
len reiten / hat hochgedachter Dertzog von
Braunschweig / einem Denny Donrot ge-
nant / befohlen / Conradten Knipping einem
Müller zu Langessen inn Goslar zuschicken /
vnd die jentgen / so ein Rath auff gemelten
Reichstag verordnen würd / warnen zulassen.
Zum sieben vnd zwentzigsten / war sey / das /
als die verordneten / nu zu mehrer irer sicher-
heit / vnd gewarsam / bey nacht aus der Stat
geritten / Sein auff dem weg / einer genant
Althane / vnd ein ander Lamprecht genant /
etwan obgemelts Burckharten von Salbers
diener / auch Denny Donrot inn negst obge-
meltem Artickel benent / neben jnen den ge-
sandten / bis gen Borcken / inn das Land zu
Wessen her gezogen. Zum acht vnd zwens-
zigsten / sagt er war sein / das viel gedachts
Dertzogen fürhaben daselbst gewest sey / dere
von Goslar brieff vnd siegel / aller irer gerech-
tigkeit / bey ben gesandten zubekomen / vnd
also jnen die zuentwenden. Sagt zum neun
vnd zwentzigsten / als der Bürgermeister
Hans Weydman ist gen Desterrode geritten /
vnd hat Weyland Doctor Conradum Dis-
genhausen bestelt gen Augspurg zureiten / de-
nen von Goslar inn jren sachen auff den
Reichs

Reichstage zu dienen / vnd solchs lautbar wor-
den ist / hat Burckhart von Salder / seinen
Knecht Lamprecht genant / von Grehen / abe-
ynn Lymbbeck geschickt / vnd auff den Doc-
tor warten lassen / vnd hat der Knecht zwölff
tage doselbst gelegen / Aber die zeit ist ihm
zu lang worden / ist widderumb aus Lym-
beck geritten / vnd der Doctor darüber gen
Augsburg vnbeleidiget kommen. Sagt
weiter zum Dreissigsten / war sey / Das Burck-
hart von Salder / auff beuelh hochgedach-
tes Hertzen / seinen Knecht Lamprechten
von Augsburg abe / an Hans Kochen ge-
schickt / mit beuelh / Jörgen Ziegenmeyer
suchen zu lassen / vnd ihn von stund an gegen
Augsburg zu fertigen / vnd solt sich daran
nichts verhindern lassen / 2c. da solt er Gerd-
ten von Salckenberg finden. Zum ein-
vnd dreissigsten / sagt Sindicus ferner / Als
Jörg Ziegenmeyer gen Augsburg kommen /
hat er Gerdten von Salckenberg doselbst
funden / dieselbigen beide vnd andere des
Hertzen von Braunschweig diener / Neme-
lich / Balthasar Stechow / Schwartz Al-
brecht / vnd auch etliche vom Adel / so do-
selbst gelegen / vnd auff den Doctor gewar-
tet / ihnen auch volgendes niddergeworf-
fen. Zum zwey vnd dreissigsten / Sagt
weiter / Das die itzt genanten / auff den
Doctor gewartet haben / vnd als er aus
Weintz

Wentz geritten ist / sein sie an ihn komen / vor
der höhe / nicht fern von Donborch / da
selbst haben sie den Doctor also gefangen /
vnd den knecht Derman Spangenberg ge
nant / betaget / inn ein dorff geheissen hohen
Dameln / im gericht Peine gelegen / vnd ha
ben den Doctor sampt dem jungen hinweg
geführt. Zum drey vnd dreissigsten / sagt
Sindicus mehr war sein / das Jörg Ziegen
meyer vnd seine mithelffer / vorgenant / dem
Doctor Dilgenhausen sein Keiserlich geleidt /
damit er inn sonderheit von Key. Ma. verse
hen / vnd andere mehr brieffe / so er bey im ge
habt / vnd denen von Goslar nicht wenig
daran gelegen gewesen / genommen / vnd dem
Hertzogen zugeschickt haben. Zum vier
vnd dreissigsten / war sey / das sie den Doctor
mit sich zur Blanckenaw gefurt / vnd inn den
Keller gesatzt / daselbst hat Jörg Ziegenmeyer
gefenglich bey im müssen sitzen. Sagt wei
ter / das Doctor Dilgenhausen / doselbst im
Keller gebotten hab vier tausent gülden zu scha
tzunge / wo er möchte los komen. So ist
auch war / da Doctor Dilgenhausen ist nider
gelegen / das der von Goslar brieffe / soniel
derselben bey ihm befunden / hochermeltem
Hertzogen gen Wolffenbüttel geschickt sein
worden / welche obgedachter Dammensstat
Secretarius daselbst empfangen. Zum sieben
vnd dreissigsten / war sey / das gemelter Secre
tarius

hartus Dammensstat/aus beuehl des Fürsten/
dieselbigen brue gegen Wirtzburg an Doctor
Marfilium bracht/der sie bey jm bis auff sein
absterben behalten. Zum acht vnd dreissig-
sten/das/ als gemelter Doctor Marfilius ver-
storben ist / hat der itzige / des Wertzogen
Cantzler Doctor N. Stabler/ die brieffe wi-
derumb/ von den erben Doctoris Marfilij ge-
fordert vnd empfangen. Zum neun vnd
dreissigsten/ war sey / das gemelter Cantzler
sich auch eins solchen (vnd das er die inn sei-
ner gewarsam hab) hören lassen. Zum
viertzigsten/sagt Sindicus ferner / war sein /
als hochgemelter Fürst von Braunschwig /
Wertzog Heinrich/ erfahren / das der Doctor
nidergelegt worden/hat sein F. G. von Augs-
purg geschrieben/ vnd Johan Dammensstat
seiner F. G. Secretarien obgemelt/zu Gerdten
von Falckenberg/vnd Jörgen Ziegenmeyer ge-
schickt/mit beuehl / das sie den Doctor / inn
Bürgen hand nicht komen/auch bey leib kein
gelt von ihm solten nemen lassen. Zum ein
vnd viertzigsten / mehr war / das Burchhart
von Salder / vnd Willicken Klenck/Gerdten
von Falckenberg/auff solchs an den Sollinck
bescheiden/von wegen hochgedachts Fürsten
mitime vmb den Doctor gehandelt/vnd ime
für die vier tausent gülden/so ihm geboten sein
worden/verwarung gethan/sein auch darfür
selbs schuldige Bürgen worden. Sagt wei-
C ter/

ter / das Kabode von Westphal / die vier tau-
sent gülden ausgelegt / vnd dem Hertzen ge-
liehen habe. Ferner sagt / war sein / das ge-
melter Doctor / nach etzlichen tagen gefürt
sey / von der Blanckenaw / nach der Winden-
burg / vnd von der Windenburg / inn die herr-
schafft von Domborch / auff eines mannes
hoffe / heist Alswede / vnd war ein hogreue
zu Digelmissen / daselbst hat der Doctor / vnd
Jörg Ziegenmeyer mit einem knecht / Dans
Wellersen genant / der itzt bey dem Marschalck
Derman von der Malsburg ist / sechs woch-
en auff einem Spicker gesessen / bis so lang der
brieff vber die vier tausent gülden / versiegelt ist
worden. Zum vier vnd viertzigsten / ist war /
Nach dem nu der brieff vber die vier tausent
gülden versiegelt gewest / haben Burckhart
von Salder / Willicken Klenck vnd Balthasar
Stechaw / den Doctor die nacht hinweg ge-
fürt / inn ein Kirch im gericht zu Lechtemberg
hochgedachtem Hertzen zustendig / gele-
gen / Dünsehen genant / darinnen hat der
Doctor den volgenden tag mit Jörgen Ziegen-
meyer vnd Dans Wellersen gesessen / auff den
abent ist er widderumb daraus genomen / vnd
nach Scheiningen gefürt worden / auff's
Schlos / da ist Dans Wellersen abgetretten /
vnd zu dem Doctor nie mehr komen. Sagt
weiter / das auff dem weg nach Scheiningen /
im feld / sich gemelter Jörg Ziegenmeyer / als
in ge

im gedaucht / die sache wolt nicht recht zugehen / der sachen / vnd auch des Doctors euffern / vnd nicht mit nach Scheinungen wollen. Zum sechs vnd viertzigsten / das darauff zu im Jörgen / Burckhard von Salder gesagt / Er solte mit / vnd wenn er sein bruder were / so wolt er im solchs rathen / Vnd wann er gleich nicht wolt / so solt er doch. Sagt fúrter war sein / das vielgemeiter Jörg Ziegenmeyer das selbst Burckharten von Salder / vnd Balthasarn Stechaw / inn namen hochgedachts Hertzogen / ein eyde hab thun müssen / das er nicht melden wolte / Was sie von wegen ihres Herrn / mit im allenthalben schaffeten. Zum acht vnd viertzigsten / sagt Sindicus ferner war sein / als der Doctor also gen Scheinungen bracht worden ist / ist Willicken Klenc zum Hertzogen gen Wolffenbüttel geritten / vnd hat Burckhard von Salder / den Doctor vnd Jörgen Ziegenmeyer inn ein Badstuben gesetzt. Zum neun vnd viertzigsten / sagt war sein / das erstgemelter Ziegenmeyer das selbst inn der badstuben vn Sinnig / vnd darumb vom Doctor genomen / vnd der Doctor also ein zeit allein ist gelassen worden. Demnach haben Jacob Wiltshütz / vnd Richstette des Hertzogen Cammerjung / auff den Doctor gewartet / bis so lang / das der Hertzog dem Doctor inn Ziegenmeyers namen / ein brieff geschrieben hat / also vngeuerlich lautende /

Er solt wol zu frieden sein/Er wolt bald kommen/vnd solte erlöset werden. Item/das solchen brieff des Wertzogen Secretarius / Martin Ketterlin / aus benelß seiner F. G. geschrieben. Vnd so ist ferner war / das gemelter Doctor / dieweil er mit schrifften also betrogen geweest/an Ziegenmeyer widerumb geschrieben hat / Solchs vngeferlichen innhalts / vnder andern / das er in ihē nicht inn des Tyrannen / Wertzog Heinrichs von Braunschwig hand wolt komen lassen/dann er were des tods / hette er nicht gnug an den vier tausent gulden/er wolt ihm mehr geben. Sagt weiter / das Jacob Wildschütze den Doctor teglichen vmb allerley geschafft (doch vnder dem schein / als were er Jörgen Ziegenmeyers knecht)gefragt habe/vnd was er dem Doctor also ausgefraget/dasselb hab er dem Wertzogen von wort zu wort wider geschrieben. Ferner sagt Sincicus war sein / das vorgenante beide / Jacob Wildschütz vnd Lichtet / so lang bey dem Doctor gewesen/das er gestorben ist/vnd haben in begraben zu Scheiningen inn dem Walle ꝛc. Item/das eins solchen gut wissen tragē/Dans von Gladebeck / als der zeit Amptman daselbst / vnd Heinrich Koch sein schreiber/welcher itzund des fürsten von Braunschwig Amptman ist zur Leuenburg / wie sie dann auch on zweiffel wol wissen/wie er/ der Doctor gestorben ist/vnd

vnd was er vor einen tod hat genommen. So ist
auch war/das Widdekindt von Salckenberg/
etwan Canonick zu Bruchffel / von wegen sein
selbs/vnd weiland herrn Johansen von Salck-
enberg / inn zeit seines lebens Thumbherrn zu
Speier / von obberurten vier tausent gulden/
tausent empfangen/vnd darfur quittirt. Wei-
ter ist war/das hochgedachter Hertzog/Dan-
sen Koch darnach hat furgegeben/ Ob er nicht
die sachen zwischen Jörgen Zigenmeyer / vnd
dem Radt zu Goslar/in einen stillstand bringen
kündt/damit Zigenmeyer nicht nidergelegt/vñ
solche practiken an tag komen möchten / vnd
hat Koch ein jar vnd lenger darüber gehandelt/
Aber die von Goslar haben nirgent in willigen
wollen. Ist furter war/das darauff Burck-
hart von Salder / Dansen Koch vnd Wenny
Donrot/zu der Kirchen zu Deberhausen/zwi-
schen Sandersheim vnd Sesen bescheiden/vñ
mit inen darauff gehandelt habe/ob man nicht
möcht wege finden/das man einen von Goss-
lar/daran gelegen/kündte niderwerffen/damit
Zigenmeyers sachen möchten vertragen wer-
den/wie Burckhart von Salder Zigenmeyern
versprochen hat. Item das die beide / Dans
Koch vnd Wenny Donrot / darauff mit ihme
dem von Salder/diesen abschied gemacht/Er
solte jemand darzu verordnen/so wolten sie ihre
Euntschafft daraufflegen. Item/das darauff
gemelter von Salder/Dansen vnd Fridrichen
D gebrü

gebrüder von Gladebeck / Item Schwartz
Dieterichen vnd Heinrichen / Dansen von Gladebeck
knecht verordnet. Item / das dieselbigen nach der hand / als auff Donnerstag nach
Petare / Anno 2c. zwey vnd dreissig / auff Dietrich
Snellen ein Goslarischen Bürger / welcher pflag viel nach Lutter / vnd Jörg von Arnem zu
reiten / gehalten. Item / war sey / das / als die
gemelten / jnen nicht / sondern ein Priester / herr
Heinrich Weigen genant / Canonick im Stifft zu
Goslar / zu sampt einem ausreuter / Heinrich
Wintzenburg geheissen / begegnet / haben sie den
knecht jnn den tod verwund / aber den Pfaffen
weg gefürt / nach Dainborch / jnn das holtz.
Sagt weiter / als jm / Burckhart von Salder /
vnd Willicken Alencken bedacht hat / der Priester
würde die sache nicht ausmachen / ist er gen
hohen Eggelsen / vor Steinbrücken dem Schlos
betaget worden / daselbst hat der Hertzog ihn
auff das haus genomen / jnn dem schein / als
wolt er sehen / wer den Priester gefangen hette /
vnd mahnen wolt / er ist aber nicht gemanet worden /
vnd hat niemand mehr nach ihm gefragt.
Vnd so ist zum vier vnd sechzigsten jar / das
volgends hochermelter Hertzog von Braunschwig /
den vorgenanten Dietrich Snellen / Bürger vnd Raths man zu Goslar / durch Dansen
von Gladebeck / am Sontag nach Jacobi im vier vnd
dreissigsten jar der minder zal / fangen lassen / vnd
hat in Dans von Gladebeck zu Burckhart

harten von Salder geführt / wo aber Burckhart
von Salder in gelassen habe / solchs mag er wis-
sen. Aber der gefangen Bürger der ist tod. Sagt
mehr / war sein / das demnach solchs auch nicht
wollen angesehen werden / hochgedachter Der-
zog von Braunschwig / mit Dansen Koch so-
niel geredt / das er einen seiner knecht / Dansen
Dintzen genant / der itzt oberster Förster ist / hat
müssen schicken / etzliche Reuter auffzubringen /
Nemlich / Achim Riben / Dansen von Glade-
beck / Schwartzten Albrecht / Jacob Wiltshüt-
zen / vnd Schwartzten Dietrichen / Burckharten
von Salders knecht / die sein inn Jörgen Ziegen-
meyers namen bey nacht auff Sonnabend nach
Reminiscere / im jar der minder zal vier vnd dreißi-
g / in die Gosslarischen hütten gefallen / die leut
darinnen geschlagen / die belge zerschnitten / vnd
ändern schaden gethan. Sagt weiter / war
sein / das zuuor vnd ehe Jörgen Ziegenmeyer ist der
von Gosslar feindt worden / hab er / Hertzog
Deinrich von Braunschwig / vnder dem na-
men vnd schein / Herman Kasslers vnd anderer
mehr / ihr der von Gosslar / der zeit feind / durch
Schwartzten Albrechten / Jacob Wiltshützen /
Achim Riben / Dansen von Gladebeck / Baltha-
sar Stechaw / vnd andere mehr / sein F. G. Amp-
ten vnd diener / denen von Gosslar / am tag Tri-
nitatis im jar der weniger zal acht vnd dreißig /
ire hütten abbrennen / ire pferd / vnd Esel / todts-
stechen lassen / vnd vmb solchs hütten bren-
Dij nen /

nen/wissen Anthonius von Wolle/vnd Andres
as Schieding / die zeit des Hertzogen Holtz-
fürster zur Dartzbrück seer wol/sein auch nicht
fern daruon gewesen. Ist ferner war/das gemel-
ter Hertzog / inn namen obgedachts Georgen
Zigenmeyers des feinds/denen von Braunsch-
wig vnd allen andern Stedten irer verbündnis/
zu dem auch etzlichen Klöstern abgesagt / vnd
vhedebrieffe zugeschickt hat / oder sie sollen bey
denen von Goslar verfügen/das sie ime Jörgen
Zigenmeyer/wolten gleich vnd recht thun. So
hat auch der Hertzog fur sich vñ inn seinem na-
men/denē von Goslar zugeschrieben/Wo den
seinen solchs feinds halben / schaden zugefügt
würde/denselbigē wolte er bey ihnen wissen/alles
zubetregung / sich mit Zigenmeyer zuuertragē.
Weiter ist war / das sein F. G. einen seiner gna-
den diener/genant Dans Dintzen/inn ein Klo-
sterhoff/geheissen der Bodenstein (gehört den
Jungfrawen im Closter Franckenberg/inn der
Stad Goslar gelegen zu) geschickt/vnd als der
darinnen gewesen / hat der Fürst inn der nacht/
Jacob Wildschützen daruor geschickt/die zeun
anzustecken/vñ sewor einzuwerffen/Solchs ha-
ben aber die jenigen so darinnen gewesen / geret-
tet/vnd den schaden verhütet. Es hat auch ge-
melter Wildschütz damals ein zettel oder vhede-
brieff inn den zann gesteckt/zum spiegelsechten/
vnd alles inn Zigenmeyers namen / aber doch
on sein wissen. Item das darauffer/der Hertzog/an

og/ an die von Goslar geschrieben/ das sie sich
mit Jörgen Zigenmeyer vertragen solten/ dann
wo im oder den seinen/ einiger schade zugefügt
würde/ desselben wolt er sich inn inen/ den von
Goslar/ wissen zuerholen. Zum zwey vnd sibenzigsten/ ist war/ nach dem das Closter Abbenrode/ welchs Dalberstetigs Stiffts ist/ denen von Goslar holtz vnd Kolen zu irem Berg vnd Nüttenwerck zugefürt/ hat der Hertzog mit Dansen Koch gehandelt/ das er mit des stiffts feinden wege suchen vnd finden solten/ das sie das Closter verbrennen vnd verstoren solten das mit denen von Goslar/ von inen kein holtz noch Kolen/ mehr zugefürt würden/ welchs auch also geschehen ist. Ist ferner war/ das Danks Koch darauff Michael Müller bescheiden/ vnd mit im derwege gehandelt/ mit zusage/ er vnd seine helffer/ solten inn des Hertzogen Lande/ allenthalben vnbesahret sein. Item/ das sich darauff Michael Müller gerüstet/ vñ als bald des Hertzogen Bawren zur Stauffenburg genomen/ bei nacht inns Closter gefallen/ alles genomen/ was darinnen gewest ist/ vnd darauff das Closter verbrenndt. Weiter ist war/ das der Hochwirdig Ertzbischoff von Magdeburg/ als ein Administrator des Stiffts Dalberstadt/ inn welchem stifft dann das obgemelt Closter Abbenrode gelegen/ einen von den thetern/ Johannes Bettluck genant/ fahen/ vnd zur Stauffenburg/ ihnen derhalben zu rechtfertigen/ hat

D in setzen

setzen lassen / darnach als hochgemelter Ertzbi-
schoff daselbs / das Recht nicht bekommen mögen
vnd der gefangen gegen Wulffenbüttel gefordert
worden / sein auff vorbescheid daselbs / von wes-
gen hochermeltes Administrators erschienen /
Doctor Laurentius Zogt / Heinrich von Doim
vnd der Mülen vogt von Magdeburg / vnd ha-
ben den gefangen zum dritten mal solcher begang-
nen that halben beklagt / Vnd ist erstlich durch
die bauren im gericht ledig gescholten / Aber vol-
gends daselbst / durch hochgedachte Hertzen
auch gemelten Doctor Zogten / vnd Doctor Con-
rad König / auff des Hertzen gemach / vom
leben zum tod verurteilt worden. Ferner sagt
Sindicus / war sein / das den vierdten tag / wid-
derumb ein ander gericht sey bestellt worden / inn
welchem der beklagt von newem antworten solte.
Item / das darauff Dans Koch zum Hertzen
allein / auff sein gemach gangen / vnd hat gesagt /
Ob er den gefangen wolt richten / ob er nicht wü-
ste / das er dem beklagten solchs zuthun befolhen
vnd sicherheit zugesagt hett / vnd solte er derhal-
ben nu sterben / Er müste solchs zum Jüngsten ta-
ge verantworten. Item / das der Hertzog dar-
auff geantwortet / er kündte solchs nicht weigern
er wolte selbst mit zu dem gericht reitten / wie ge-
schehen. Item / das sein S. G. daselbs gehal-
ten / von neun vhr / bis zu vieren gegen der nacht /
ehe das vrtell ist ergangen / vnd der arme verur-
teilt worden. Item / das dabey auch / gemelter
Doctor

Doctor Zogt / von wegen hochgedachts Ertzbt-
schaffen von Magdeburg / als Amministrators zu
Halberstat / auff einem wagen gehalten. Item
war sey / das / als aber das vrtail wollen verstreckt
werden / der Hertzog vmb den gefangen / vnd
verurteilten gebeten / das man jme den geben wol-
te. Item / das seiner F. G. gemahel / ein magd
von dem Frawenzimmer herab geschickt / welche
auch vmb den armen gebeten / vnd seiner zu der
Ehe begert hat / darauff ist er ledig gegeben wor-
den / hat die zu der Ehe genomen / vnd noch auff
diesen tag zum Eheweib. Noch mehr ist war /
das hochgedachter Hertzog von Braunschwig
darnach mit Hans Koch geredt / bey Derman
Bock zuuerfügen / das er sich inn die sachen schli-
ße / vnd versuchte / hochermelten Bischoffe zu
Magdeburg / mit Michael Müller zuuertragen /
welchs Derman Bock angenommen / vnd hat die
sachen / inn massen sie im angemutet / vertragen
vnd hingelegt. Item / das solchs alles
stat vnd Landruchtig / auch bey mens-
niglich ein öffentlich ge-
schrey sey.



